

國朝閨閣詩鈔

國朝閨閣詩鈔

第八冊

繪聲閣詩稿

錢塘

陳長生

婦笙

琴香閣詩箋

東鄉

蔣徽

錦秋

曉春閣詩集

長洲

尤澹僊

寄湘

貯月軒詩稿

湘潭

郭佩蘭

芳谷

翡翠樓詩集

長洲

沈纓

蕙孫

繡餘小草

常熟

歸懋儀

佩珊

吟香館詩草

奉新

江蘆英

雪娥

環碧軒詩集

常熟

沈綺

素君

藕香館詩鈔

歙縣

何佩玉

琬碧

露香閣詩草

元和

嚴蕊珠

綠華

第八冊

卷一

陳夫人長生字婦笙一字秋穀浙江錢塘縣人
太僕寺卿兆崙孫女麗江知府某女廣西巡撫
歸安葉紹棿室著有繪聲閣詩稿

繪聲閣詩稿

錢塘陳長生婦笙

秋江晚行

落日下江潯
暝色在高樹
漁燈生遠岸
歷亂不知處
微聞柔櫓聲
又繞蘆洲去

花朝曲

去歲花朝花已落
十丈殘紅飄繡幕
今歲花朝花未開
春風不到蛾原來
蛾原已作經年住
欲

覓春花無覓處空餘芳草綠萋萋愁說王孫從
此去王孫欲歸歸得無孤燈深夜聽啼鳥此時
却憶故園柳綠到門前第幾株遙知柳綠無人
折都爲年年不知別今朝醺酒酌花神定祝春
花堆似雪春花似雪不歸家却看他鄉雪作花
莫怪花神無賴甚不移春色到天涯

觀音門舟夜

落日金陵渡輕帆此暫停水流三楚碧烟鎖六

朝青漁火殊明滅滄波入杳冥夜長人未寐蓬
底漏疎星

城南晚歸

城南天尺五地僻豁雙眸樹色鴉邊暮人家雁
底秋煙光迷淺浦嵐氣接層樓更愛迴車處蒼
蒼蘆荻洲

初夏二首

未必春殘勝事稀綠窗人靜惜芳菲雨餘瘦蝶

伶俜舞風軟閒花自在飛偶課金經頻檢字爲
調玉軫罷裁衣屏紗欲掩還重啟好待雕梁乳
燕歸

虛堂瑟瑟度南薰炷盡沉檀散午芬沸鼎茶聲
疑作雨隔簾花氣欲生雲嘔心句少吟逾苦信
手碁多敗亦欣小倦不須尋素簾碧闌干外易
斜曛

春園偶賦

賣餠聲裏日初長
春滿閒庭花事忙
樓外軟風鶯夢暖
籬邊疎雨蝶衣涼
碧桃重似垂頭睡
紅藥殘如半面粧
看盡韶光應不倦
題詩長倚小迴廊

黃陵廟

蒼涼古寺俯明湖
芷屋椒堂事有無
未辨芳魂來澧浦
空傳清淚灑蒼梧
花深紺殿飛蝴蝶
月冷青山叫鷓鴣
莫向汀洲尋翠珮
湘南到處長

靡蕪

長干曲

儂住長干里離愁動隔年生
僧門外柳不繫九江船

枕上口占

街鼓分明枕上聽又疑身已到西泠
朦朧起認窗前月燈漸殘時夢漸醒

夏日

虛堂人靜淡于秋
敲罷殘碁局未收
槐蔭一庭簾不捲
日長閒煞小銀鈎

第八冊

卷二

蔣宜人徽字琴香一字錦秋號石溪漁婦江西
東鄉縣人黔西知州吳嵩梁繼室善畫山水著
有琴香閣詩箋

琴香閣詩箋

東鄉蔣 徽錦秋

讀正始集寄呈珍浦太師母

三百篇首傳關雎南國女子皆能詩鵲巢麟趾
厚風俗不以雕繪矜浮詞後來閨閣增佳什織
錦迴文推第一黃崇嘏高及第名朱淑真留斷
腸集才德能兼古亦稀曹大家及徐賢妃請聽
中聲協琴瑟從知雅化本宮闈詩教熙朝邁前

古風雅頌咸稱得所天上遙聞韶濩音人間都
按霓裳譜紅香僊館啟蘭陵壇坫金闈久服膺
千篇麗句收吟篋六法餘波補畫徵僞體別裁
追正始繁聲一洗箏琶耳博取清新俊逸才妙
歸敦厚溫柔旨閒氣乾坤有特鍾大篇往往出
沈雄曾擅文章兼武畧况持奇節表孤忠此編
一出人爭誦碧海長鯨丹穴鳳翰墨全家感並
收姓名許附千秋重安輿迎養有名臣慈蔭甘

棠萬樹春我本再傳詩弟子莫嗤小婢學夫人
琴香閣夜坐

入夜渾無事閒吟倚玉缸清風剛入戶明月恰
當窗讀畫情初倦評詩興未降塵心從此靜遙
聽寺鐘撞

作畫

作畫饒清興閨中日課勤溪山隨意仿邱壑此
中分脫藁原無定揮毫白不羣攜來看仔細紙

上但烟雲

香海棠巢讌集

萬朶千葩綴露條
樽前銀燭又高燒
香疑沉水風纔度
紅愛嫌山雪未消
子固詩工應解恨
太真舞罷不勝嬌
清名艷福容兼領
花事年年記此宵

題張雲裳女史鄧尉探梅圖

梅花深處擢歌長
記泛湖天入混茫
千樹白雲

山不見一篙明月水俱香
仙詩縹緲還元閣
豔蹟低徊響屨廊
賃廡願尋偕隱約
鷗波爲我畫漁莊

步月

望月嫌花密
亭亭下玉階
嫩寒禁不得
香露溼弓鞋

登開元寺閣

十栢叅雲列翠屏
飛花墜粉滿中庭
天寒試倚

琴香閣詩箋

辛九

危樓望雪後千峰睡未醒

題岳綠春女史畫蘭遺幅

露葉風枝妙墨多聽香館是小鷗波避他一管
生花筆自寫溪漁舊綠蓑

題潘伴霞漱芳閣遺稿

小謫三湘亦俊游綵鸞寫韻有高樓怪來詩思
清於水玉女盆曾借洗頭

憶石谿館

銀沙一徑掩蒼苔
錯認寒梅照水開
今夜石溪溪畔路
有誰踏雪看花來

第八冊

卷三

尤女史澹仙字素蘭一字寄湘江蘇長洲縣人
工詞賦及駢體文年十八名列吳中十子著有
曉春閣詩集

曉春閣詩集

長洲尤澹仙寄湘

夜讀心齋先生詩

遠林散疎光天際上明月閣迴生微寒簾啟延
虛白徙倚獨沈吟何以遣幽夕檢得心齋詩三
復殊超絕雲吐遙山青露沈芳條潔默默一寸
心領契難宣說更抱碧玉絃松風響庭末

田家雜興

曉春閣詩集

辛丑二

微雨溪上來斜陽澹茅屋平原一以眺良苗靄
如沐鳩鳴杏花紅村暗榆陰綠野老善識時相
勉還相祝膏潤貴及時秋稔已可卜

春夜喜山人送梅

寒林漠漠春無影欸扉有客來銅井折得梅花
遠寄將一枝猶帶溪雲冷我亦羅浮謫下仙相
逢此夕豈徒然狂呼明月伴我飲世人那識三
嬋娟

讀武侯傳

經世推王佐伊周共瘁勤君才能一統天意定
三分飲血承遺詔攻心靜徽氛英雄終古恨淚
灑出師文

湖上泛舟同清溪夫人作

一櫂沿流去初晴淑氣新梅花湖上路楊柳笛
中春遠水澹含色好風都及晨篷窗間倚望面
面遠山顰

秋夜書懷

一天遐思碧雲流挂起湘簾豁遠眸無賴心情
羞見月不堪消瘦怕逢秋蛩依落葉寒吟露砧
帶涼風靜入樓芳酒滿尊書滿榻遣愁贏得十
分愁

春泛

韶華三月及良辰著意尋春不見春斷澗殘鐘
紅雨寺夕陽孤棹綠簑人一旗招客搖晴市雙

燕銜花入軟塵此地土風還太古他年端擬結
芳鄰

夏夜

玩月憩池塘獨把瑤琴弄清風漾荷珠打破鴛
鴦夢

秋夜懷家大人

秋雨秋風送晚涼空閨此日斷愁腸遙知萬里
關山外早雁聲中望故鄉

南園

夕陽淡淡雨花收
好向南園拾翠遊
一徑垂楊風不斷
春雲如水入溪流

讀吳志

三分割據大江東
霸業居然繼父功
臣服魏廷緣底事
始知先主獨英雄

聽琵琶奉家嚴命代作

切切嘈嘈撥不停
清江一曲思冥冥
分明十五

年前事倚馬涼州月下聽

春暮

春到江南欲暮時
梨花如雪柳如絲
近來無限傷春意
并恐東風亦未知

第八冊

卷四

郭瑞人佩蘭字芳谷湖南湘潭縣人監生贊賢
第三女鄆縣知縣汪燦妹貢生王德立室雲南
知縣繼閔之母與姊友蘭並爛吟詠著有貯月
軒詩稿

賸月軒詩稿

湘潭郭佩蘭芳谷

黃節婦詩

南山之松不畏霜雪北山之竹不懼摧折所恃
伊何正氣盤結維彼黃母與之抗節白日墮地
秋風怒號鴻雁于飛爰失其曹哀鳴何嗷嗷欲
死不敢死上有老姑下有弱子妾身去何所倚
代夫教讀作甘旨古井之水誓不起糠燈晃晃

機聲膠膠十指血流曷敢告勞三十餘年有如
一朝千鈞重一髮懸至誠感報所天子又生孫
孫又子俾爾昌熾何繇繇於今節婦壽考令終
光照邑乘傳播無窮我作詩歌敬仰高風

秋意

秋意西來爽飄然滿太空人煙江水外雁影夕
陽中冰簟消殘暑羅衣受晚風倚樓頻遠眺清
思付詩筒

元夕寄懷笙愉姪女

曾記吟香閣燈宵夜不眠梅花初結社旗鼓各
爭先獨有阿咸句春風柳絮妍而今重對月悵
望碧雲天

同楚畹二姊夜話

爐煙香燼漏聲遲話到衷腸酒不辭音問久疎
魚鳥至容顏都已雪霜欺慈烏返哺傷今日鴈
序凋零憶昔時他日旗亭分袂後殷勤還望寄

歸期

送竹溪弟赴雲麓兄鄆縣署

三千里外古長安壯志能輕行路難
深羨天涯姜被暖轉憐湘浦雁行單
鷄鳴月曉函關遠木落秋高華嶽寒
料得征車方到日桃花滿縣簇征鞍

雪美人

是誰巧奪天工手恍惚瑤臺月下魂
莫怪冰肌

寒徹骨平生原不解溫存

杏花蛺蝶圖二首

一枝嬌豔覆東牆日暖風和蝶正忙記否上林
春色好綠陰深處夢魂香

栩栩遽遽幻亦真夢回莊叟悟前因香閨妙有
滕王筆繪出江南二月春

夏日

薰風遙送芰荷香深院沈沈日正長閒坐北窗

臨晉帖不知人世有炎涼

題荷花便面二首

綠雲堆裏露華滋
冉冉淩波見幾枝
何處風光最相憶
水西亭外日斜時

不辨花光與水光
盈盈翠袖遠生涼
月明露冷渾無語
殘夢依稀落野塘

寄懷浣香女

前月音書寄遠郵
歸期差慰倚閭憂
鯉魚風急

秋江晚祇愁歸帆阻石尤

柳枝詞

莫向江頭賦采藍柔條旖旎正春三舊游曾記
題詩處多半城南與水南

第八冊

卷五

沈女史纓字蕙孫一字散花號玉香仙子江蘇
長洲縣人祁門教諭起鳳女諸生林衍潮室工
詞賦及駢體文善吹洞簫著有翡翠樓詩集文
集浣紗詞簫譜

翡翠樓詩集

長洲沈 纓蕙孫

讀騷

江水流不息落日秋風勁
漁父誠知言千載悲
獨醒瓊佩終不渝
芬芳自輝映
微詞莫能顯
感物托其性
風詩固一變
聲哀義彌正
願鼓湘靈瑟
高歌發清聽

讀詩

鴻濛未開闢元氣混太清陰陽截解竹樂律還
相生猗與三百篇正始諧咸諷至理歸自然遇
物風和鳴後世爲文藻古人爲性情運會代升
降先貴權重輕洪鐘無纖響聽之自和平風雅
猶可作邈焉求其聲

貞女峽擬韓

怪石觸龍尾龍怒與石戰以尾決江水衝石石
中斷石斷勢益猛江水縮一綫行人過此峽疑

有風雷變擺石萬瓦裂下與饒龍咽其險也若
斯蜀道何足算

題楊太真清華宮上馬圖

野鹿銜花宮禁悄沈香侍宴歸來早念奴報道
宿醒消果下名駒鞚初好春風扶困上雕鞍娉
婷仙骨何珊珊杏子裙遮金埒暖鴛紋袖寵玉
鞭寒香塵暗逐飛花外半響鸞鈴搖月佩邀得
君王帶笑看生憐冠絕風流隊那知鐵騎起漁

陽鼙鼓驚殘歌舞場無奈六軍皆不發馬前宛
轉殉紅妝

秋寺和碧岑妹韻

秋寺寒煙溼支筇望不迷石林殘雨響樵徑亂
雲低落葉埋人跡疎鐘送馬蹄我來參大乘斜
日下招提

題心齋居士小影

夜色涼于水風高一雁吟幽人坐遙夕對此澹

秋心花影暗橫砌松聲併入琴疎簾鈎乍起小
逕晚寒深

書中乾蝴蝶

此身未肯沒蓬蒿翰墨鑽研志趣高
早竝蟲魚登爾雅自尋香草到離騷
憐他金粉耽綳帙寫爾芳魂托綵毫
一卷南華憑夢醒始知栩栩亦徒勞

真娘墓

翡翠樓詩集

辛丑

水佩風裳土一堆題詩費盡白家才
愁魂怨魄誰曾見踏草攀花我獨來
三尺鴛鴦空有塚千秋雲雨本無臺
生公說法誠多事不使羅裙化劫灰

題趙承旨畫蘭

可憐王者香零落憔悴瀟湘第一枝
空說王孫留綵筆難爲騷客寫愁思
故宮落日悲荊棘周道秋風怨黍離
何處托根猶故土淡烟細雨伴

江離

采蓮曲二首

紅蕖十里曉風涼
露滴儂家翠袖香
橋畔盈盈雙髻女
隔溪相喚渡橫塘

小立新涼掠髻絲
畫樓吹罷玉參差
紅衣墮地無人見
月白風清子夜時

春日寄懷清溪夫人二首

黃鶯百轉最關情
曲港桃花漲欲平
爲報春光

容易老聽殘紅雨到清明

羞看乳燕語雙雙情緒懷人卽肯降寂寞梨花
寒食夜夢隨流水下吳江

奉答清溪元韻

雲天迢遞繫相思三復瑤章欲和遲閒倚小樓
頻悵望玉羅窗外月斜時

第八冊

卷六

歸女史懋儀字佩珊號虞山女史江蘇常熟縣
人巡道朝煦女上海諸生李學璜室著有繡餘
小草

繡餘小草

常熟歸懋儀佩珊

擬古三首

灼灼園中桃蒼蒼嶺上松
春風固自得冬日亦
爲容造化豈有殊物性自各鍾繁華逞目前安
能保其終所以古哲人勵志尋高蹤

論古耿中懷商周非黃虞獨有吾性存猶能混
沌初時運有升降大道無盈虛守已保其真勿

爲文質拘斤斤同異閒祇成章句儒

文章亦一藝功因載道起天籟發自然名言醞
至理警歎寄一時違應占千里我讀上古書其
文渾渾爾吁嗟三代還日誇雕繪美

錢塘弩

怒濤滾滾排山至此是英雄不平氣英雄靈爽
豈易降人中乃有吳越王錢王意氣邁當世所
貴存心在利濟裂石穿波強弩開潮頭轉向西

陵逝勢如轟雷震山嶽水底蛟龍盡驚避寶劍
光橫十四州得意難忘根本地父老歡呼草木
榮丈夫至此豈無情龍飛鳳舞應前識他年遂
作長安城陌上花開春復春鈿車零落埋香塵
至今江口寒潮急猶似當年射弩聲

麗豎燭

玉堂高良夜靜兩行綠鬢珠簾影雙眸光射簡
編青蠟花紅過枝頭杏墨光如漆顏如玉如此

豪奢差不俗十載聽雞蕭寺中名成合享風流
福奪得黿頭付阿兄鉅筆如椽專史局按來新
樂五音調小宋名高宮禁熟翦燼清宵素手勞
焚膏綵袖揚清馥月初高風弄竹丹鉛已看盈
篇幅應與金蓮一例傳千秋照耀雙枝燭

五人墓

千古人心終不死吳中義激五男子貂氛肆餒
朝野昏翻手勢欲傾乾坤印綬累若不知數鞠

躬俯首聲復吞平居持議徒雄壯袖手委蛇誰
奮往翻將文墨節奸貪捫心內愧曾無狀五人
生不讀詩書位不列簪裾但以善惡爲毀譽當
其攘臂共赴難義勇直欲浚專諸嗚呼名敗身
殃餘賄賂穹碑峻宇等朝露松柏青青耐歲寒
冶遊人奠山塘路

感懷

欹枕夢頻驚殘釭暗復明愁多天地窄情重死

生輕浮世原知幻諸魔未易平秋蟲爾何苦斷
續和悲鳴

聞唐陶山明府重修桃花菴感賦用原韻
遺祠重爲拂埃塵補種天桃幾樹新紅粉也知
憐國士青衫偏是困才人不逢良木寧求蔭肯
爲黃金便屈身縱酒佯狂聊玩世笙歌隊裏老
青春

題女史葉小鸞眉子硯

螺子輕研玉樣溫
摩挲中有古吟魂
一泓暖瀉桃花水洗出
當年舊黛痕

第八冊

卷七

汪女史蘆英字雪娥江西奉新縣人諸生廖積
性室夫婦能詩互相唱和時稱佳偶著有吟香
館詩草

吟香館詩草

奉新汪蘆英雪娥

送別

江頭四月開晴煙楊花柳絮飛接天畫舫風帆
壓波綠郎行欲發凌晨船一杯淡酒三千里從
此相思數行紙渭北江南本舊遊詩囊收盡江
山美羨郎詩比工部工周遊四方如轉蓬橫槎
一掉煙波遠三十六鱗何處通異地風光終草

草承歡莫若歸來早長亭有贈總言深杜陵漫
向江湖老

春日雜興

椒醕初成後羣花爭欲然柳條輕鎖霧梅蕊淡
含煙滿地苔痕潤沿階草色鮮天清還日麗把
盞趁春妍

紅梅

金屋曾將貯石家依然不改舊豪華淺凝香汗

薄仙露新着羅衣
賽紫霞入鏡自憐眉黛好
臨風猶怯舞腰斜
含嬌恍似西施醉倩把輕煙代
碧紗

畫梅

尺幅傳神別有奇
墨痕香處也離披
橫斜未許山禽覓
冷瘦從無牧豎知
晤對期君偕結伴
品題容我細敲詩
東皇黜陟渾閒事
根蒂遙辭委地時

病起述懷

病起窗閒廢女工支離瘦影怯西風
柳疎煙滅空江翠楓老霜添夕照紅
半載吟懷驚聚散一生心事惜玲瓏
飛聲羌笛人何處遙望青天數落鴻

病中作

枉費銜泥趁早春巢空雛去總酸辛
風流女史孤清譽香國平章負佛因

景曾夢至佛所署妾以香國平章之職

白髮原期倩老計青山便欲擲殘身芙蓉縱有
重來路惆悵三生迹已陳

新柳

一夜東風趁晚潮淡黃顏色正抽條風流漫向
人前舞錯認蠻姬鬪小腰

庭梅早開

庭梅閒着兩三花便占春暉第一家郎莫辭貧
慳酒費巾箱留有碧雲紗

寄兄

祇愛扶犁不讀書北窗別署野人居力耕自是
吾家事莫負當年擁鼻初

惜春

一天花柳暗飛香暖綠輕紅燕子忙何事簾垂
長不捲湖山孤負好風光

寄寒衣

瘦盡寒山雁陣歸秋風爲寄禦寒衣可知點點

相思淚到得持砧力已微

第八冊

卷八

沈女史綺字素君江蘇常熟縣人諸生殷尊室
博通經史兼精律厯著有環碧軒詩集四卷文
集四卷四六二卷唾花詞一卷管窺一得十二
卷徐庾補註四卷

環碧軒詩集

常熟沈 綺素君

錄別二首

盤中雙玉環本出連城珍珠以古良工精功方
入神視世無足當什襲全其真常恐偶褻越負
此千金身何期感同調琴瑟旋相親相親未逾
時相送長河濱長河無還流遠憶多苦辛

歡娛無百歲聚散那不休喻彼大海潮晨夕無

停流憶昔與君別惆悵不能留迴身就綺閣兀
坐來煩憂亦有盈樽酒非君誰勸酬仰視雲中
鳥嗷嗷求其儔繁獨成相失山川鬱綢繆何時
當來歸與我常優游

聞笛

月暗砧響停風肅蛩語悄側耳空外聽何處秋
聲早激徵與悲商楚楚傷懷抱未知吹者心聞
者情如槁豈不纏綿思思深令人老

登莫釐峰絕頂

具區名山七十二就中巉絕莫釐峰遊人千百
無一到往往氛霧迷樵蹤我來登陟值秋杪金
風掃出青芙蓉徑上層岡度絕巘一逕屈曲趨
喬松羣峰漸漸覺低伏衆石一一呈玲瓏如屏
如笏千萬態造物所幻難形容飛橋橫空更奇
險側足千仞臨奔淙絕頂直上何所有但見吳
越諸山蜿蜒起伏拱作案東南萬派汪洋浩淼

來朝宗高者青螺下者練茫茫一氣歸洪濛舉
手摘星斗俯身跨虬龍西望崑岡東海上雲夢
奚止八九吞心胸乃知茲山撐天拄地雄五嶽
惜無虞帝望祀秦王封

題次昇姊秋林小景

次昇畫癖不可醫次昇作畫真畫師豈惟長絹
善揮灑只此短紙誰能爲野曠天寒氣蕭爽人
坐茅亭絕塵想階前落葉雨欲來天末晴雲心

獨往青山滴滴青於苔平地忽見芙蓉開秋聲
似向耳邊起帆影遙從天外來意長要在無多
筆餘墨淋漓綴唐律詩中有畫畫中詩深閨今
見王摩詰

廢莊弔古倣李賀體

白雲黃竹秋風歇一道寒泉土花咽哀蛩粉壁
流暗光殘霞墮溪藤葛涼苦煙恨骨埋蒿里哭
聲水寒凝不起青屏玉女斷香魂露黛如嗔怨

秋鬼

江村

春水響潺潺漁舟日往還江空月出早樹靜鳥
歸閒潮到將吞岸雲飛欲動山夜來風雨過花
落滿前灣

秋夕

鼓角動譙樓星河爛不收梧桐雙井月砧杵一
城秋落葉添新感寒蛩起暮愁夜潮應已長離

思託西流

春日山莊雜興

蒼翠層樓合林巒四望分樵歌煙外出猿嘯夜
中間花氣常浮澗禽聲半在雲翛然塵境遠麋
鹿亦同羣

第八冊

卷九

何女史佩玉字琬碧一字鵑霞安徽歙縣人兩
淮鹽知事秉棠三女千總學禮妹揚州祝麟室
與姊佩芬妹佩珠俱嫻吟詠著有藕香館詩鈔

藕香館詩鈔

歙縣何佩玉琬碧

春暮遣懷

多病惜慈親春寒費調護卅載齋鹽勞怡然甘
守素兩鬢早如霜雙眸半遮霧感此傷寸心無
言倚庭樹

題常熟張孝女傳後

孝女心天上月萬古清光長不沒孝女顏雪中

花千秋香豔明于霞十齡失怙心如剖宛轉相依惟阿母屏除粉盞與脂籤日侍茶鐫兼藥日窈窕窗前守一經天然玉立秀亭亭螺丸肯畫雙彎碧閒煞虞峰入鏡青傳家雅有支機石笑語承歡自朝夕不繡鴛鴦並鳳凰簪花小仿曹娥格溫青辛勤二十年一朝母病痛難痊人間那有長生藥苦乞參苓曉夜煎背人偷捲香羅袖欲倩肌膚延母壽空庭悄立月無光虬箭沈

沈催玉漏瓠犀深。嚙臂脂殷。眼波迸裂。攢眉山。
一線金刀。飛白練。血痕盡。變桃花斑。烹作羹湯。
進母食。繞牀忍著。淒涼色。豈知母病太沈。絲百
轉。千回。醫不得。生身恩重。此身輕。代死籲天天。
亦驚一辨心。香虔默禱。椎心欲泣。不成聲。悲鳴
鵬鳥號風。木戶外。清霜折。慈竹白。雲痛絕。影超
超。愁對寢幃。燈暈綠。香桃骨瘦。不勝衣。麥粥微
餐。藥餌稀。含笑隨親歸。碧落雁行。腸斷惜分飛。

芳名真合標青史彤管傳來憑阿姊南國徒誇
彼美人北宮不數嬰兒子焚香讀處首先低今
古何人可與齊惆悵琴河寒食節女貞花發孝
烏啼

聽外話皋亭桃花之勝

春波浩蕩風泠泠扁舟結伴來皋亭閒鷗靜鷺
解迎客蘭橈直到花邊停一株秀而整穿雲蟠
過青山頂一株豔而嬌欹斜暗束青山腰日麗

霞衣翻片片何處東風識人面漫天匝地卷紅
潮花耶峰耶都不辨一重花護一重山珊瑚倒
插翡翠環但愁封姨掃作胭脂雪勝遊肯放金
樽閒望中紅白疎密向背不可數彷彿身入流
水天台間千枝萬枝迷處所山欲出雲花不許
華鬢世界爭紅塵惟聽仙禽空際語感君話舊
向晴窗茶嫩香清蝶影雙遊女如雲花似海便
思打槩泛春江

春水二首

揮手河梁日欲昏
煙波無際黯消魂
照來瘦影如相惜
化盡離愁不見痕
乳燕掠圓芳草岸
新鶯啼暖杏花村
更憐細雨斜風裏
一夜無聲綠到門

一片粼粼欲作波
并刀難翦奈愁何
青浮大地連天遠
綠擁羣峯挾雨多
征夢頻牽帆上錦
香塵微染襪邊羅
龍紋嬾效油花卜
惆悵韶年草

草過

秋漁

舴艋低捎雁齒橋
春源回首路迢迢
楓林紅滿溪南北
錯認桃花水一條

十一字詩

一花一柳一漁磯
一抹斜陽一鳥飛
一水一山中一寺
一林黃葉一僧歸

第八冊

卷十

嚴女史蕊珠字綠華一字寶仙江蘇元和縣人
諸生家綬女少工吟詠年十七名列隨園女弟
子中著有露香閣詩草

露香閣詩草

元和嚴蕊珠綠華

桃花塢

淥水抱桃林春風吹爛漫
深塢鳥聲幽隔花人影散
憑弔讀書廬夕陽紅雨亂

夜觀鞦韆戲

梨花乍開杏花落深院
朦朧月色薄雙竿百尺
立中庭淡雲低護紅絲索
美人玉貌超凡羣半

酣結束紅羅裙留仙不住忽飛起丁冬環珮空
中間一笑低頭顧女伴腰支無力飄揚緩髻斜
墮馬玉釵垂眼底明霞烘頰暖百樹金盤絳蠟
燒氤氲香霧迷春宵簾幕沈沈漏聲永五銖衣
薄猶含嬌翩躚再試迴鸞舞彷彿霓裳別翻譜
飄飄繡帶曳長虹簷前影墮驚鸚鵡

紈扇

織就蟬紗薄蒲葵樣不同清風生袖底皓月落

懷中製羨班姬巧詩慚柳惲工夜深搖小院螢
火墮光紅

浮玉樓晚晴

浮玉全遮柳人家掩映居風輕扶弱燕花落聚
游魚渡靜橫孤艇農歸荷短鋤河汀新霽後最
愛畫難如

兩兄讀書浮玉樓奉呈二首

文窗窈窕敞空虛棣萼樓高得所於笙典珠璣

探二酉露研雪纂課三餘桐花棲穩收香鳳芸
葉驅除蝕字魚排闥雲山來萬疊詩情畫意更
何如

棠棣花開最上頭彈琴擊鉢共夷猶清才雅續
聯珠集妙手雙修五鳳樓風送漁歌來硯席燈
催燕影上簾鉤定知兄弟憑闌飲不吸長江勢
不休

春日雜詩四首

簾鎖鑪香盡日垂
曲闌低亞坐題詩
慈親指點桃花笑
憶否當年噴面時

黏天芳草翠平鋪
三月江南似畫圖
小立溪邊春被禊
水中人影萬花扶

薄寒天氣掩窗紗
九十韶光半已賒
戲翦彩幡庭畔立
教他常護未開花

如煙小雨潤苔衣
花鳴風酣蛺蝶飛
楊柳多情又多事
綰將春到放春歸

歸鴻曲

春風一夜到衡陽
旅雁驚心覓故鄉
寶瑟無聲明月冷
幾行殘字落瀟湘

寄戴柔齋夫人

聞川煙水望迢迢
我住松陵第四橋
他日挂帆容訪戴
不逢雪夜卽花朝

鷺脰湖棹歌

鏡面波光點黛螺
鳴榔處處起漁歌
朝來幾陣

廉纖雨雪色銀魚上綳多

秋日雜興二首

矜光殘滑兔毫柔落墨須教腕力遒開匣怕枯
鸛鵲眼一泓秋水洗雙眸

泉試茶經活火烹玉棋敲落月三更西風亂翦
芭蕉葉斜掠書窗夜有聲